

E intant che il timp
al flurive,
e inviavin li feminis
il mont
cun lôr vui
scrutinant dilunc vie
i cuarz di lune
e i muvimenz
da marine e dai lâcs.

Un ram di aulîf
ta mans di un fî bessôl
tal miez dal curtîl,
sielt da mari
par fermâ
le bissebove,

un trat cui dêz
par segnâ
il fôc di Sant Antoni,
rosepile e malatiis
di cristians
e di bestiis...

e il podê riscôs
da vite e da muart
par solevâ
dal inutil patî
vui di pûc viarz,
vui che no rivavin
bessôi a distudâsi.

Il lôr savê
e consegnavin
a le prime fie
di prin jet,
come misteri
di tramudâ
dome vint remondât
il spirt
di ogni berdei.

E par chist e vevin
di spietâ
le ploie.